

13. ZLATNA MEDALJA ORGANIZATORU (15. februar 1984)

Promrzao na pitoreskim padinama Bjelašnice, juče se Huan Antonio Samaran – očito zadovoljan onim što vidi i doživljava u predahu olimpijskog nadmetanja u veleslalomu – samoinicijativno obratio novinarima – izvještačima iz tamošnjeg press-centra. Rekao je, da su ga naročito impresionirali navijanje i velika posjeta takmičenju, iako je riječ o veoma hladnom vremenu. Dodao je zatim:

- „...Organizatori su zaslužili zlatnu medalju za današnji veleslalom na Bjelašnici. Vidi se da je sve srcem organizovano...”

U masi gledalaca ponovo su prepoznate ne male grupe novih gostiju i navijača koji su tek pristigli iz različitih pravaca, sa različitim nacionalnim i državnim amblemima, sa različitim manirima navijanja na različitim jezicima.

Sarajevo je i danas, očito, obogaćeno velikim brojem bjelosvjetskih namjernika.

Danas su svojim suhim cifarskim argumentima novonastalu „svjetsku sarajevsku opsesiju” potkrijepili novim podacima. Štampa je predočila da je na Aerodrom Sarajevo od 1. do 14. februara sletjelo 440 aviona. Samo na taj način u ovaj grad doputovalo je više od 40.000 putnika da bi posjetili Sarajevsku olimpijadu. Po riječima dispečerke Aerodroma, Sanije Memić, vazdušno pristanište u Sarajevu otvoreno je svakog dana, a najveći dnevni zastoji u saobraćaju, zbog krupnih vremenskih neprilika, iznosili su najviše dva sata. Samo juče na ovaj aerodrom sletilo je 20 aviona sa 1.800 novih posjetilaca Igara.

U talasima novih, pridošlih posjetilaca prepoznati su, takođe, i oni gosti koji na poseban način nose, kao brojna izaslanstva i delegacije, raznolike poruke i simbole u znak zahvalnosti i priznanja svemu onome što je učinjeno, i što se još uvijek čini, u prilog univerzalne humanističke ideje olimpizma.

Juče su to bili, na primjer, delegati Lozane, grada u kojem je sjedište MOK-a, sa gradonačelnikom Paul Rene Martinom na čelu, i koji su sarajevskom gradonačelniku Uglješi Uzeleu prenijeli zahvalnost i priznanje za sve ono što su Sarajevo i ova zemlja učinili za blistav uspjeh organizacije XIV zimskih olimpijskih igara. U ime kineskih gradova to je učinio i zamjenik ministra unutrašnjih poslova ove velike zemlje Yu Lei, koji je izrazio ista osjećanja, a posjetom Olimpijskom selu Mojnilo odao posebna priznanja Sarajevu za izvrsnu organizaciju, pored ostalog, društvenog i zabavnog života sportista, kao i za način njihove bezbjednosti i komfor u ovom naselju.